



Broj/Broj: 01,2-50-1-127-23/05
Sarajevo/Sarajevo: 15.03.2005.

ZAPISNIK

sa dvadeset treće sjednice Komisije za vanjske poslove

Sjednica je održana 10.03.2005.godine u pauzi zasjedanja Zastupničkog doma Parlamentarne skupštine BiH, u uredu predsjedatelja broj 215/II.

Sjednici su prisustvovali sljedeći njeni članovi: Martin Raguž, Seada Palavrić, Izet Hadžić, Jelina Đurković, Azra Hadžiahmetović, Sead Avdić, Nenad Mišić i Vinko Zorić.

Odsutan je bio g. Milorad Živković.

Zapisnik su vodili Merdžana Iglica, sekretar Komisije i Edina Hrnjić, student stažista.

Predsjedatelj Komisije, g. Martin Raguž predložio je sljedeći:

DNEVNI RED

1. Usvajanje zapisnika sa 22. sjednice Komisije za vanjske poslove Zastupničkog doma Parlamentarne skupštine BiH, održane 11.01.2005.;
2. Pripreme za posjetu delegacije Komisije za vanjske poslove njemačkom Bundestagu, 14.-17.03.2005.;
3. Informacija o održavanju javnog saslušanja «Migracije, integracija i razvoj: ka evropskoj politici?», Brisel, 14.-15.03.2005. (poziv upućen predsjedatelju Komisije);
4. Informacija o sastanku predsjedavajućih parlamentarnih komisija za vanjske poslove i za evropske integracije zemalja učesnica u SEECP, Bukurešt (Rumunija), 24.-25.03.2005.;
5. Informacija o formiranju Grupe prijateljstva s BiH pri Državnom zboru Republike Slovenije;
6. Informacija- međunarodni ugovori koje je BiH zaključila do kraja 2004. godine, a koji su u pripremi za ratificiranje (materijal MVP-a);
7. Zabilješka sa sastanka Komisije za vanjske poslove sa novoimenovanim veleposlanicima BiH u inozemstvu, 14.02.2005.;
8. Informacija o najavama Austrije za organiziranje međunarodne mirovne konferencije za Balkan u prvoj polovini 2006. godine;
9. Informacija o rezultatima parlamentarnih izbora u Turskoj Republici Sjeverni Kipar;
10. Pismo Patricka Moriau-a, predsjedatelja Grupe Belgija-Balkan u Zastupničkom domu Parlamenta Belgije o davanju podrške Geertu Versnicku, kandidatu za predsjednika Interparlamentarne unije;
11. Posjeta delegacije Zastupničkog doma PS BiH Francuskoj (poziv upućen predsjedavajućem Zastupničkog doma, g. Šefiku Džaferoviću);
12. Tekuća pitanja.

Ad.1. Komisija je razmatrala predloženi i dopunjeni Dnevni red Komisije za vanjske poslove Zastupničkog doma Parlamentarne skupštine BiH i jednoglasno ga usvojila.

Ad.2. Zapisnik sa 22. sjednice Komisije za vanjske poslove Zastupničkog doma Parlamentarne skupštine BiH, održane 11.01.2005.godine, jednoglasno je usvojen.

Ad.3. Komisija je konstatirala da su završene sve pripreme za posjetu delegacije Komisije za vanjske poslove njemačkom Bundestagu i SR Njemačkoj od 14.-18.03.2005.godine. Još jednom je potvrđen sastav delegacije, uz jednu izmjenu. Naime, umjesto g. Vinka Zorića putuje g. Sead Avdić, tako da konačan sastav delegacije izgleda ovako: Martin Raguž, Milorad Živković, Seada Palavrić, Jelina Đurković, Sead Avdić, Izet Hadžić i Merdžana Iglica. Predsjedatelj Komisije, g. Raguž izjavio je kako se radi o respektabilnoj delegaciji te da Komisija za vanjske poslove koja je prethodnog dana, u funkciji priprema za posjetu, bila na radnom ručku kod ambasadora SR Njemačke u BiH, treba temeljito proučiti podsjetnik za razgovore sa zvaničnicima ove nam prijateljske zemlje i dobro se pripremiti za razgovore s njima.

Ad.4. Komisija je primila k znanju informaciju o održavanju javnog saslušanja «Migracije, integracija i razvoj: ka evropskoj politici?», Brisel, 14.-15.03.2005. Predsjedatelj Komisije izrazio je žaljenje zbog nemogućnosti prisustvovanja javnom saslušanju zbog već preuzetih obaveza u vezi s posjetom njemačkom Bundestagu. Gđa. Hadžiahmetović također je izrazila žaljenje zbog činjenice da niko od članova Komisije neće biti u mogućnosti da prisustvuje saslušanju, budući da se teme saslušanja tiču Komisije za vanjske poslove.

Ad.5. Komisija je primila k znanju informaciju o sastanku predsjedavajućih parlamentarnih komisija za vanjske poslove i za evropske integracije zemalja učesnica u SEECP-u, koji se održava u Bukureštu (Rumunija), 24.-25.03.2005.godine. G. Raguž je predložio da u slučaju njegove spriječenosti da prisustvuje sastanku, u Bukurešt otputuje g. Živković, prvi zamjenik predsjedatelja, ili gđa. Seada Palavrić, drugi zamjenik predsjedatelja Komisije.

Ad.6. Sekretar Komisije, gđa. Iglica upoznala je članove Komisije sa formiranjem Grupe prijateljstva s BiH pri Državnom zboru Republike Slovenije. S tim u vezi, g. Avdić naglasio je neophodnost rješavanja pitanja formiranja grupa prijateljstva pri PSBiH sa zemljama koje takve grupe već imaju pri svojim parlamentima. S tim u vezi, g. Raguž predložio je da se već na prvoj sljedećoj sjednici Komisije, među prvim tačkama dnevnog reda nađe Prijedlog Odluke za formiranje Grupa prijateljstva sa parlamentima drugih zemalja koji su pripremili sekretar Komisije i Međunarodni odnosi i Protokol PSBiH. Komisija će zauzeti stav o ovom materijalu i dostaviti ga Kolegijima oba doma na mišljenje.

Ad.7. Raspravljajući o Informaciji MVP-a BiH o međunarodnim ugovorima koje je BiH zaključila do kraja 2004.godine, dobijene na zahtjev Komisije, gđa. Seada Palavrić napomenula je kako ima slučajeva nemarnog odnosa pojedinih ambasadora prema ratificiranim sporazumima i konvencijama koje donesu Predsjedništvo BiH i Parlamentarna skupština BiH. Nakon toga, riječ je uzela gđa. Hadžiahmetović koja je navela kako se izvršni organi vlasti ne oglašavaju povodom ispunjenja postprijemnih obaveza u VE, pa se dešava da se onda od delegacije pri VE traže izvještaji o postignutom napretku. Na to je g. Avdić odgovorio kako je ipak obaveza delegacija da Parlamentarnoj skupštini dostavljaju određene izvještaje o tome što su postigle, pa da se tek onda poziva Vijeće ministara da se oglasi po tim pitanjima. Predsjedatelj Komisije podsjetio je onda članove Komisije na radni sastanak Komisije i MVP BiH koji je načelno dogovoren još na 21. sjednici Komisije.

Taj sastanak, kako je istakao g. Raguž bit će svojevrsna prilika da se pokrenu mnogobrojna pitanja, a među njima i teme o kojima su govorili gđa. Palavrić, gđa. Hadžiahmetović i g. Avdić. Sastanak bi, prema riječima g. Raguža, trebalo što prije organizirati i, svakako, medijski zabilježiti.

Ad.8. Zabilješka sa sastanka Komisije za vanjske poslove sa novoimenovanim veleposlanicima BiH u inozemstvu, održanog 14.02.2005. primljena je k znanju, uz sugestiju predsjedatelja Komisije da se aktivnosti veleposlanika počnu intenzivnije pratiti, na način da se svakoj zemlji dodijeli po jedan dosije koji bi bilo potrebno redovito ažurirati. G. Avdić je postavio pitanje šta su uradili bh. veleposlanici u Srbiji i Crnoj Gori i Hrvatskoj kada je u pitanju suspenzija pojedinih odredbi ugovora o slobodnoj trgovini između BiH i susjednih država koju je donijelo Vijeće ministara BiH. Na to je g. Raguž odgovorio da je Komisija otvorena za bilo kakvu vrstu rasprave, i da će Komisija, ukoliko to članovi smatraju potrebnim, pozvati veleposlanike BiH u SCG i Hrvatskoj i na taj način saznati šta se dešava i kako teče proces suradnje u regionu.

Ad.9. Ova tačka dnevnog reda izazvala je kraću raspravu kao reakciju na informaciju prosljeđenu iz MVP-a BiH o najavama Austrije za organiziranje mirovne konferencije za Balkan tokom prve polovine 2006.godine. Naime, g. Hadžić izrazio je nezadovoljstvo zbog izložene ideje o strategiji za Balkan po kojoj bi Bosna i Hercegovina, Srbija i Crna Gora, Albanija i Makedonija bile «zajednica nezavisnih država povezanih na gospodarskom principu». U vrijeme kada BiH ima jasno utvrđen evropski put i kada je postignuta potpuna suglasnost ka individualnim naporima za priključenje evro-atlantskim integracijama, svrstavanje BiH u istu grupu sa Srbijom i Crnom Gorom, te Albanijom, vraća Bosnu i Hercegovinu s tog puta. Prema mišljenju g. Hadžića, nema potrebe stvari «vraćati u paket», kad se zna da je Solunska agenda jasno odredila individualni pristup svake od zemalja Evropskoj uniji. S ovim su se složili ostali članovi Komisije i zaključili da će na predstojećem radnom sastanku sa predstavnicima MVP-a BiH tražiti razjašnjenje i ovog pitanja.

Ad.10. Komisija je primila k znanju informaciju o rezultatima parlamentarnih izbora u Turskoj Republici Sjeverni Kipar.

Ad.11. Sekretar Komisije, gđa. Iglica podsjetila je članove Komisije da je podrška za mjesto predsjednika Interparlamentarne unije data Pieru Ferdinandu Casiniju još prilikom posjete g. Selve, predsjedavajućeg Odbora za vanjske poslove Parlamenta Italije Bosni i Hercegovini. Budući da je na Delegaciji BiH u Interparlamentarnoj uniji da svojim glasom podrži nekog od kandidata, g. Avdić je predložio da Komisija ne sugerira delegatima za koga će glasati. Na to je g. Raguž odgovorio kako Komisija treba dostaviti jedan dopis našoj delegaciji u kojem im treba sugerirati da vode računa o našim interesima, tj. o onome što je ranije dogovoreno.

Ad.12. Predsjedatelj Komisije uzeo je sebi u zadatak da se kao član Kolegija Zastupničkog doma PSBiH pri odabiru delegacije koja će putovati u posjet Francuskoj, pobrine za to da u Francusku obavezno otputuje i neko od članova Komisije.

Zapisnik sačinila: Edina Hrnjić, student stažista